



Sabtu, 4 September 2021
Ogen: Esekiel 13:17-23



Ciga Ate Tuhan Ajimat-Ajimat



W Ola bahandu gana-gana entah gambar-gambaren kerna kai pe si lit i datas langit, i doni entah pe si lit i bas lau i teruh doni....” enda me perentah Dibata si peduaken ipeseh Musa man bangsa Israel. Dibata e badia, dengen la ngena ateNa kalak erdua ukur man baNa alu erbahan sembah-sembahen sideban. Adi siuri i bas pustaka, tangkas ituriken maka kerina kalak si make dibata-dibata sideban ngaloken ukumen i bas paksana.

Bagepe i bas renungenta wari enda, Dibata mpersingeti bangsaNa segelah mperdiateken sekelewetna. Sabap, lingkungan bangsa Israel i bas paksa e lit i tengah-tengah bangsa si melala sembah-sembahenna. Melala si ernubuat labo erpalasken persuruhan Dibata, make ajimat-ajimat guna nguasai kalak sideban entah pe guna datken keuntungan-keuntungan pribadi. Kalak si make ajimat-ajimat e ikataken mekarus man Dibata, nundalken Kuasa Dibata, janah ciga ate Dibata kalak si bage.

Adi siperdiateken ku bas kegeluhenta, maka melala nge singaku enggo Kristen tapi pakena denga ajimat-ajimat guna banci penjaga daging, penergang, tahan tebak, pelaris, pemanis, isi babah ras sidebanna. Si enda akapna maba keuntungan i bas kegeluhen. I bas paksa si kentisik banci saja jadi bagi si isurakenna, ialokenna ulihna. Bicara pelaris ndai, minter kin kai sidayaken e melala si nukursa. Bage pe pemanis, minter itatap kalak manis akapna. Si make penjaga daging minter tenang dengen tetap ukurna berkat ku ja pa pe. Tapi perlu iinget maka kerina si enda erbatas, erlimit dengen i bas paksana maba mara ras cilaka i bas kegeluhen. Si akap kari untung kepeken puntung. Sada dalan si banci erbahanca puluh i bas si e kerina e me Kuasa Dibata. Mari deheri Dibata, pindo gegeh ras kuasaNa erdahin bas geluhta, maka kinijuah-juahen e jadi sekerajangenta.